

# «Mintgigna e mintgign pò s'angascher pigl rumantsch»

Simona Demarmels è la nova co-presidenta dall'Uniun Rumantsch Grischun Central (URGC). Ella è neida eligeida dalla radunanza generala dall'URGC tgi ò gia li an scretg. La FMR ò fatg treis dumondas alla nova donna agl timung dall'uniun tgi ò per fegnameira da promover igl surmiran ed igl sotsilvan. Ella vign a manar l'uniun ansemen cun la Sotsilvana Gierina Michael.



Simona Demarmels è scolasta e la sia gronda passiu en igls sies dus tgangs.

FOTO MAD/SIMONA DEMARMELS

MATIA DEMARMELS/FMR

Siva digl aton passo era l'URGC stada alla tschertga d'en successour u d'ena successoura per *Zegna Pitet-Dosch* tgi veva demissiuno siva da 7 onns scu presidenta/co-presidenta. All'antschatta digl meis era neida publica la candidatura da *Simona Demarmels*. *Gierina Michael* era sa mussada cuntainta avers la FMR: «Ja sung fitg surliveida tgi nous vagn finalmaintg catto ena candidata ed ia ma legr da luvrar ansemen cun *Simona Demarmels*.» La FMR ò ruschano cun la *Surmirana* tgi è carscheida se a *Salouf* e veiva oz a *Savognin*.

**FMR: Simona Demarmels, cordiala gratulaziun per la Vossa elecziun. Tge è stada la mutivaziun d'Az metter a disposiziun per chella carica?**

**Simona Demarmels:** La mia mutivaziun da m'angascher è neida siva dalla votaziun an *Surses* davart igl rumantsch grischun. Ia va sustignia la reintroduziun digl surmiran. Adversaris ed adversaris dall'initiativa vevan pero detg cun raschung tgi persungas tgi viglian anavos igl surmiran, seian siva dumandadas e duessan mussar angaschamaint. Per deir pi curt: La mia mutivaziun è da m'angascher pigl rumantsch surmiran e sotsilvan – pigl rumantsch aint igl Grischun Central.

**Concret: Tge monta per Vous da «s'angascher» pigl rumantsch aint igl Grischun Central?**

Ia sung digl meini, tgi en lungatg uscheia pitschen dovra angaschamaint dad pledaders e pledadras. Igl pi impurtant è tgi el vigna vivia aint

igl mintgade. Cun far chegl mintgigna e mintgign tgi pò s'angascher. Angal cun garanteir la translaziun d'inscripziuns an rumantsch ni cun promover igl lungatg ve dalla meisa da famiglia ègl gio fatg en bung po. Dasperas dovrigl naturalmaintg las instituziuns tgi s'angaschan e procuran pigls aspects pi tecnics. Chegl fon l'URGC e la LR tranter oter, p.ex cun translater u crear texts scretgs. Igl pi impurtant resta pero tg'igl rumantsch vigna vivia aint igl mintgade.

**An tge direcziun less la nova co-presidenta manar l'URGC?**

Per me ègl impurtant da gl'amprem amprender a canoscher an detagl l'uniun e las tematicas actualas. Anfignen ossa era betg an l'uniun. Pass a pass lessa vurdar tge tgi è pussebel da mutantar. Chel process lessa far ansemen cugls mies collegas da suprananza, varsaquants en gio er gist antros. Communablamaintg nigntsa alloura ad elaborar ena strategia pigl proxim taimp.

## Ulteriouras roschadas an suprananza

Dasperas *Simona Demarmels* en nias eligias *Flavio Guetg* da *Savognin* scu cassier, *Mèn Candreia* da *Stierva* scu suppleant e delego, e *Patric Vincenz* da *Savognin* scu represchentant dalla *Sotselva* e da *Surmeir*, ainten la suprananza dalla *Lia Rumantscha*. Els ramplazzan *Marc Decurtins* e *Gion Capeder* tgi en stoss angascheas durant differents onns per l'URGC.

## Ples madretschas e padregns a Lantsch

An preschientscha da ples sportistas e sportists è sto a Lantsch igl battesim digl nov nom per l'Arena da biatlon Lai.

Da nov sa nomna chella «Roland Arena». Cun la firma «Roland» tgi produtgescha da tottas pastizareias d'apero è nia fatg en contract da seis onns.

GION NUTEGN STGIER/FMR

Avant otg onns è neida inaugurada l'Arena da biatlon a Lantsch. Davos chel project è cunzont sto igl cumegn da Lantsch, dantant er igl cumegn da Vaz. Sustignia è chel project er nia da blers oters cumegns da *Surmeir*, dalla regiun, digl *Cantun* e dalla *Confederaziun*. Cun discorrer dall'Arena da biatlon a Lantsch dastga betg mantger en nom e chegl è chel da *Michael* e *Carola Hartweg*. Igl pèr ò investo passa diesch milliuns francs per la realisaziun dalla *Tessa Nordica*, oz en bietg tg'ins canoscha scu l'arena er gliunsch sur igls cunfegns svizzers. Cunzont *Michael Hartweg* ò er en grond maret tgi all'Arena da biatlon

Lai on gia li gl'onn passo igls campiunadis mundials da biatlon digls juniors e tgi igl 2025 segnan *Lai* e *Lantsch* per l'organisaziun digls campiunadis mundials da biatlon. Tgi l'Arena da biatlon *Lai* vign da nov sustignida dalla firma «Roland» è er d'angraztger a *Michael Hartweg*.

### Bungas tractativas

El dei tgi las tractativas cun la direcziun dalla «Roland Murten SA» seian stadas fitg ampernevas. Igl process vegia cuzzo bung seis meis avant tg'ins vegia fatg igl contract da partenari per ena perioda da seis onns. La famiglia *Cornu* sa mossa fitg generosa per pudeir dar all'Arena da biatlon *Lai* igl nom «Ro-

land Arena». Chegl tgi pertotga la somma da sponsoring ò *Michael Hartweg* betg tradia. Igl contact tar la direcziun dalla «Roland Murten SA» è nia per *Michael Hartweg* antras las biatletas e treis soras *Gasparin*, ellas tgi vignan sponsorisadas da chella firma dalla *Romandie*. Las treis biatletas on er dimoraa a Lantsch e l'arena è per ellas quasi er lour datgesa.

### Er anc otras sportistas ed oters sportists

La «Roland Murten SA» è pero betg angal igl sponsour persunal da *Selina*, *Aita* ed *Elisa Gasparin*, mabagn er dad otras sportistas da renom ed oters sportists ancunashaints. Stada a Lantsch scu ma-

dretschas igl de digl battesim dalla «Roland Arena» è er la skiunza *Corinne Suter*, ella tg'ò fatg igl anvien passo a *Cortina* d'Ampezzo dus medaglias. Dalla parta era er las skiunzas *Jasmin Flury* e *Joana Hählen*. Tranter igls padregns eran alloura er igl passlunghist *Jason Rüesch* ed igl biatlet *Niklas Hartweg*, campiun mundial digls juniors 2019. Sponsorisada dalla firma dalla *Svizra franzosa* vign er *Jolanda Neff*, la sportista e specialista da velo da muntogna.

### La firma «Roland»

La firma segna gio siva digl 1939 per la produziun da pastizareias d'apero scu bastunets salos, brezel, pang croccant, biscotged anc bler oter. La sedia princi-

pala è a *Murten* ed an possess è la «Roland Murten SA» dalla famiglia *Cornu*, tgi stat a *Champagne* aint igl cantun *Vad*. L'interpresa ò 360 ampluias ed igls sies products exportescha ella an 40 terras. 60% digl stgammaint fò la firma cugl export da products. Directour dalla «Roland Murten SA» è *Marc-André Cornu*. Per la produziun digls products dovrigl an en onn igl latg da 2600 vatgas e caschiel tgi vign fatg cugl caschiel da 460 vatgas. Per produtgier vign duvro salegn digls èrs cun ena surfatscha da 1030 hectaras u detg oter cun ena grondezza da 1442 plazs da ballape. An en'oura vignan produtgias automatic anfignen 28 800 bastunets salos tar la «Roland Murten SA».



Las dus sportistas e madretschas *Corinne Suter* (san.) e *Selina Gasparin*.



Da nov sa nomna l'arena «Roland Arena» e betg ple Arena da biatlon *Lai*.

FOTOS GION NUTEGN STGIER